

# Fasnacht 2018

Will si z' Bärn die Hunde-Kurs-Pflicht abgeschafft hänn  
niemmer nimm folge, mache wieder was mr wänn  
jetz goht d' Boscht ab, mr kenne uns vo dr Laine rysse  
und im verby go em Böschtlar in d' Waade bysse.

Mr singe gärn Schnitzelbängg und hänn Spass  
laufe ass Bäffzgi amme dur d' Fasnachtsgass  
aber s' hett e Noochschmagg zimmlig e fahle  
ass mr fir die drey Dääg no mien Hundestyrr zahle.

Alli Yysbäre sinn abgsegget, was hesch was gisch  
wo Doris Leuthard in Grönland uff em Yys gschtande isch  
wäg ihrem Allwätter-Mantel und ihrem Charme däm stolze  
isch hinder ihre grad en Yysbärg gschmolze.

Alli Rächtnige vo minere Kosmetik, Zahnarzt und vom Gwafför  
erledigt mi Maa, au die vom Schönheitschirurg und em Massör  
nur machts mi verruggt, denn är heftet die Rächtnige ganz stur  
immer in Ordner fir Sanierig, Umbau und Reparatur.

Wo do dr Fringer Ohrefyygli bykunnt und e Gingg an d' Wade  
sait d' Frau Constantin zem Maa: "Hör jetz uff mit däne Eskapade,  
es isch immer nur dr Alkohol tschuld do bi dir!"  
denn maint är: "No bi'n'y aber froh, ha gmaint s' liggt an mir".

Eso'ne Klatsch uff d' Bagge bis es bläuelet und grient  
ha'n'y dänggt, däm sy Gsicht het doch e Applaus verdient.

Mr kemme wohrschynlig nit drumumme  
und zahle halt die Hundestyrr, mir Dumme  
aber s' Schlimmschte isch no, jetz wänn die Fräche  
uns no'ne Hunde-Chip in d' Larve stäche.

E Wahnsinn, was an däm Black Friday in dr Stadt so lauft  
y ha denn au grad e Kaffi-Automat fir e Lappe kauft  
mr hänn zwar scho Fimf in dr Kuchi stoh  
aber no kai soo Ginschtigi, das Schnäppli ha mr nit lo entgooh.

Die neje Neetli sinn jo OK, aber wie gsait  
friehner hani als vyyyl mee Waar uss de Lääde drait  
aber hitt gitts nimm vyyyl, denn muesch bedängge  
ass efang iiberall so Iiberwachigs-Kameras hängge.

Mi Doggter hett gsait, y sell Sport dryybe, dä hett mr gfalle  
jetz spiel y halt ganz vergiftet Tennis, in dr Halle  
und y hoff schwer, y bi jo nit blöd und nit dumm  
ass y denn au bald dr Doggter-Titel bykumm.

Es kryselet bi dr Bolizey, und e Krise in dr Baudep.-Fiehrig  
jo iiberhaupt herrscht e Krise in dr ganze Regierig  
zem Gligg isch jetz s' Bethli Ackermaa doo  
denn mit Däre hett die Krise s' passende Gsicht bykoo.

Wo'n'y die Blaggedde gsee ha, hett's mr fascht ebbis gäh  
no ha mr iiberlait, sell y jetz trotzdäm Aini näh  
denn wenn y se aalueg muess y jedesmol gäähne  
s' hett fascht glych vyl Figure druff wie im Stücki ääne.

[www.bäffzgi.ch](http://www.bäffzgi.ch)

---

Wottsch au by uns bänggle?

Uff [www.vsg-basel.ch](http://www.vsg-basel.ch) erfahrsch meh!

